


南董繹史勤本


第四冊


畧紀



內閣文庫			
二八	二	八八	漢
函	二	七	書
三	四	七	類
架	冊	號	

內閣文庫	
番號	漢 8877
冊數	24 (4)
函號	286 187







南疆繹史勘本卷三目錄

雪川溫氏原本



古高易氏勘定

紀畧三

唐王

右閩疆紀畧第三○王英才大畧在藩服之時
已思有所施為及遭逢患難磨礪愈堅兩京既
覆枕戈泣血躬行節儉以裕兵食性喜文辭手
撰三詔御製祖訓後序行在縉紳便覽序皆典

雅可誦所至訪求書籍軍行亦載書數十乘聽
納諫說拔錢邦芑金堡於下僚置之言路欲其
有所開陳章奏朝至夕發或送后代批后亦讀
書通明識治體王嘗與之決事篤念舊恩不遺
纖微於從興諸臣恩澤尤渥不可謂非一時令
主也論者徒見其不能出關遂言好作聰明自
爲張大無人君之度此以成敗論耳夫鄭氏起
盜賊目無君上據有全閩富貴已盈始願亦不
及此而欲責以鞠躬盡瘁經營天下難矣王之

托於鄭氏所謂祭則寡人而已其二三心膂之
臣所藉以恢復者如黃道周蘇觀生皆儒雅可
觀祇將畧未優又束縛其手足不能一展所長
悲夫悲夫天之所廢誰能與之雖有忠義如之
何哉

南疆釋史勦本卷三

紀畧三

唐王太祖九世孫也諱聿鍵小字長壽其先唐定王
高帝第二十二子封於南陽父器盛唐世子追封裕
王母毛氏王生十二歲祖端王惑於嬖妾欲立其愛
子遂囚世子於承奉司王亦從之有大志雖處患難
而意氣不挫年二十有八尙未請名世子爲其弟壽
歿端王諱之將傳國於次子分守道陳竒瑜入弔謂
王曰世子薨逝不明若不立其子事且露國法重

王懼始請名立爲世孫崇禎五年端王薨王襲位年三十一矣選妃曾氏諸生曾文彥女七年流寇入河南南陽當其衝城卑薄王捐千金謀修築知府陳俊豪勿授工王上言詔逮俊豪下獄王乃援潞藩例請增兵三千人設叅將一員以陳永福充之不許八年冬賊再犯南陽上疏言臣府護衛一千二百人近制以其半爲汴梁班軍給撫臣以下策使無誤惟明詔念臣困阨以全軍見還莊烈帝報之曰南陽番軍班直祖制已久朕不敢變時欲行宗室換授之法陳子

壯署禮部事執不可王貽書於子壯相駁難稱說典訓援據經傳皆有本廷臣顧勿及知特以爲諸侯王尚氣持異同而已子壯尋下獄衆口惜子壯者輒以尤王王亦薄公卿爲不足重而尊宗藩體統劾總督盧象昇不朝其所建請頗多與羣臣相牴牾帝意亦不之善也九年秋八月京師戒嚴王率護軍勤王汝南道周以興制之不聽至裕州巡按御史楊繩武以聞旨下切責爲前鋒值寇亾內豎三人乃返國十一日下部議廢爲庶人安置鳳陽高牆押發官同知張

有度欲以檻車行王自裁不殊至鳳陽守巷奄人索
賄不得墩鎖以困苦之不勝其辱病幾殆曾妃割股
以進始愈有司廩祿不時資用乏絕時有望氣者以
高牆中有天子氣言於淮撫路振飛振飛假賑罪宗
名入見王心異之王告以吏虐狀振飛上疏請加恩
罪宗贍以私錢且責吏之無狀者王甚德之甲申春
三月北都陷南京福王立大赦王出高牆禮臣請復
王爵不許命徙駐廣西之平樂府乙酉夏五月行抵
杭州而南都已覆王勸潞王監國不聽時鎮江總兵

鄭鴻逵自京口戶部主事蘓觀生自南都胥會于杭
遂奉王入閩六月甲戌次浦城閏六月癸未福建各
官迎謁于水口驛南安伯鄭芝龍禮部尚書黃道周
福建巡撫張肯堂等三箋勸進王出御用銀一百五
十兩令有司葺行宮勿擾民丁亥至福州監國建行
在太廟社稷時鄭芝龍擁兵驕悍鴻逵欲王早正位
以繫人心芝龍猶豫弗決羣臣多言監國名正建號
宜遲不報丁未祭告天地祖宗卽位南郊以福建爲
福京福州爲天興府布政司爲行殿大赦稱號隆武

追尊皇考爲皇帝妣爲皇后遙上福王尊號曰聖安
皇帝芝龍鴻逵俱進爵爲侯其弟芝豹封澄濟伯鄭
彩永勝伯並賜號奉天翊運中興宣力定難守正功
臣以黃道周爲吏部尚書武英殿大學士蘇觀生爲
吏部右侍郎兼東閣大學士福建巡撫張肯堂爲兵
部尚書兼左都御史何楷爲戶部尚書四川按察使
曹學佺爲禮部尚書福建巡按御史吳春枝爲兵部
右侍郎兼右副都御史周應期爲刑部尚書鄭誼爲
工部尚書黃錦爲禮部右侍郎並賜號奉天翊運中

興宣猷守正文臣各官進秩有差自道周外凡有聲
望者何吾驪蔣德璟黃景昉朱繼祚林欬楫姜曰廣
吳姓高弉圖路振飛曾櫻鄭三俊熊開元黃士俊顧
錫疇陳子壯林增志李先春陳洪謐等皆遙授閣輔
戎車轉側至者數人後林增志李先春先至同人閣
辦事王性素儉少遭患難既卽位慨然以復仇雪恥
爲務布衣蔬食不御酒肉勅司禮監行宮不得以金
玉玩好陳設器用磁錫幃幄被褥皆布帛絕去錦繡
後宮無嬪妃御執事者三十人而已中宮懿旨選女

厨十人王聞之以爲擾民不許勤於聽政批閱章奏
丙夜不休上書陳言軍國大事者輒以手詔答之素
好讀書博通典故手撰三詔與魯監國書羣臣皆莫
能及重風節重文學收召名士不次擢用其志欲大
有爲於天下而阨于時勢乃爾感路振飛舊恩募能
致者賞千金給五品秩六月浙東張國維朱大典孫
嘉績方逢年等迎魯王監國紹興時浙西已降附
大清兵方在江楚吏部侍郎楊廷麟兵部侍郎萬元
吉國子祭酒劉同升等以義師往來捍禦克復吉安

臨江等處遂加廷麟兵部尙書兼東閣大學士賜劍
便宜從事元吉副都御史總督江西湖廣諸軍以同
升爲南贛巡撫時王優禮鄭氏以閩事屬之芝龍長
子森入見竒其表賜國姓改名成功命提督禁旅以
駙馬都尉體制從事芝龍議陳戰守事宜自仙霞關
外當守者計百餘處應設守兵若干其戰兵以今冬
簡練明春出關一出浙東一出江右計兵二十餘萬
台閩粵餉不支一年仍請于兩稅正供內米一石預
借銀一兩令羣臣捐俸勸紳士輸助察府縣歷年積

穀銀兩未解者悉催赴行在遣侍郎科道徵發吏部主事王兆熊兼御史督御餉急迫不輸者榜其門曰不義於是閭里騷然矣芝龍又請清理寺田可得餉八十萬王不聽戶部侍郎李長蘅請廣開事例從之無論廝養隸卒皆得給劄授官猶苦餉不足守關兵僅數百人率疲癯不堪用設儲賢館定十二科取士以蘇觀生領之已而招徠者多挾邪士王亦厭罷王以盜賊之興皆由貪吏虐民欲效高皇帝之法懲之建陽知縣沈燦貪酷被劾特勅誅之輔臣申救不聽

由是人稍知懼廷臣日請出關王屢戒征期芝龍輒以餉絀爲辭會賜宴大臣芝龍自以侯爵欲位首輔上黃道周爭以祖制武職無班文臣右者終先道周芝龍鞅鞅不悅道周知芝龍無意視師乃自請出關號召義旅圖恢復王許之請兵請餉芝龍皆不應僅給羸卒千人賫一月餉秋七月辛未道周率以行八月乙酉頒祖訓五十七條於閣部科道大學士林欲楫率諸臣表謝庚寅命肅鹵伯黃斌卿出鎮舟山命吳江諸生孫文中賚手勅召路振飛及其至拜太子

太保吏兵二部尙書文淵閣大學士官其子太平爲
兵部員外郎壬辰册曾妃爲后贈后父曾文彥爲吉
水伯癸巳行郊天禮於南郊芝龍鴻逵稱疾不從戶
部尙書何楷劾其無人臣禮宜正厥罪王喜楷敢言
命掌都察院事命婦朝后於太和殿邵武知府吳爇
煒推官朱健聞敵畏蕙棄城先逃下獄誅靖江王嘉
亨僭號桂林執巡撫瞿式耜幽之兩廣總督丁魁楚
遣總兵陳邦傳往攻封魁楚平粵伯加式耜兵部侍
郎式耜得釋卽令中軍焦璉合邦傳兵擒之行保甲
法於天興府定錦衣衛軍制設中前後五所每軍百
戶曰一威所八威所爲一禁軍時兵事皆掌于鄭氏
芝龍自知衆論不平不出關無以弭衆乃請以鴻逵
出浙東彩出江西各擁兵數千號數萬旣出關託候
餉仍駐不行鴻逵駐仙陽鎮慮有上書言事者嚴禁
仙霞關不聽四方儒人入王檄催孔亟不應彩行百
里而還稱餉缺留如故九月
大清兵取徽州時李自成兵敗奔九宮山爲村民鉏
擊以歿楚督何騰蛟以聞其衆無所歸推其兄子李

錦爲主同自成後妻高氏高弟一功等乞降騰蛟與
攝撫堵胤錫往受之一時增兵數十萬王大喜告廟
進騰蛟大學士封定興伯胤錫右副都御史實授湖
北巡撫總制其軍降將皆授總兵官賜李錦名赤心
一功名必正高氏爲貞義夫人號其營爲忠貞營已
而糧不繼降者稍稍散去高李十三部就食施州衛
其餘郝搖旗馬進忠王進才張允翠袁應第牛萬才
張先璧等十餘營悉隸騰蛟麾下軍勢頗振然王內
制於鄭氏不能出關相應援也十月科臣劉中藻頌

諭浙東魯王不受自是閩浙相水火矣原任兵部郎
中王期昇御史彭遇颺至行在加期昇總督銜遇颺
僉都御史大學士路振飛曾櫻封還內傳謂遇颺依
附馬士英期昇在太湖奉朱盛澂稱通城王派餉苛
虐不可用王乃止楊廷麟疏至請王幸江右何騰蛟
請駐湖南浙中諸將請如衢州王以芝龍不足恃欲
出贛入楚倚騰蛟會原任臨清知州金堡朝行在言
騰蛟可倚急宜棄閩幸楚王大喜卽擢堡兵科給事
中決計由贛以赴長沙遣大學士蘇觀生先詣南安

募兵戶部尚書何楷請告去未幾歿之十一月甲午類於上帝乙未禋於太廟丙午禡於社稷丁酉以鄭鴻逵爲御營左先鋒出浙江鄭彩爲御營右先鋒出江西駕幸西郊行推轂禮先期爲壇設先帝高皇帝位王御翼善冠詣壇所百官陪位武臣戎服聽事王皮弁升壇拜謁立於神位西南面御營先鋒北面跪兵部授鉞王東向揖之賜餞光祿寺授爵御營先鋒跪受爵誠勞畢謝恩出率將士跪壇下王甲冑誓師乃鳴金鼓揚旌而出當授鉞時風雨晦冥大風陡起壇上燭盡滅神位皆仆鴻逵出城馬蹶踣地識者以爲不祥下詔親行以唐王聿劍鄧王鼎器監國大學士曾櫻協同芝龍留守以吳震文爲隨營兵部侍郎王覲光爲隨營戶部侍郎皆兼吏戶禮三部事張家玉陳履貞爲隨營兵科亦兼吏戶禮三科事命曹學佺修思宗實錄設蘭臺館以處之十二月甲申王戎服登舟大學士何吾驥等隨行舟次芋江五溪百姓壺漿迎者載道皆賚以銀牌壬寅黃道周師潰婺源被執南贛巡撫劉同升卒命萬元吉兼攝其事

大清順治三年丙戌春正月己酉朔唐王在建寧稱
隆武二年不受朝賀以三大罪自責令百官皆戴罪
從行交趾日本國皆遣使入貢廣東布政使湯來賀
運餉十萬由海道至擢來賀戶部右侍郎馬士英叩
關求入朝王數其罪諭守關將士勿納士英七疏自
理終不許魯監國遣柯夏卿曹維才來聘王加夏卿
兵部尙書維才允祿寺少卿手勅謂朕無子王爲皇
太姪同心戮力共拜孝陵朕有祚土終致於王取浙
東所用職官同列朝籍不分彼此尋遣僉都御史陸
清源解餉十萬犒浙東江防諸軍以散給不平方國
安縱兵奪餉殺清源或曰士英使之也而閩浙釁益
深矣熊開元罷以蘇觀生兼吏兵二部尙書行在文
淵殿大學士出爲經畧賜上方劍便宜行事王御門
賜銀印曰瞻奉南北山陵安集軍民文武官召見泉
州布衣蔡鼎授爲軍師二月馬脛嶺兵變命路振飛
至浦城安撫之江楚迎王疏相繼至詔寬逆案之禁
王曰北京陷于東林南都亡于魏黨厥罪維均今中
興之初嘉運綦新其附黨諸臣概予洗濯以收後効

擢堵胤錫右副都御史巡撫湖廣丁亥大雨雹聞所
無也風霾晝黑對面不相見廣西有僧自稱弼光召
九卿科道議將迎請廷臣曰卽真弼光甫經失國有
尊奉而無迎請已而有司審知其僞下獄誅之嘉亨
俘至下諸王議廢爲庶人以幽歿誅其臣顧奕吳之
琮楊國威張龍翼等三月戊申朔督師大學士黃道
周殉節南京王聞慟哭轍朝贈文明伯王將出汀入
贛與湖南爲聲援芝龍使軍民數萬人遮道號呼擁
駕不得行芝龍因具表請回天興王不得已駐劄延

平封成功爲忠孝伯以張肯堂爲留守旋加少保總
制浙直給勅印便宜從事辛未

大清兵破吉安鄭彩棄廣信奔入關夏四月五日萬
壽節不受賀未幾撫州亦破命禮臣追復建文年號
立方孝孺祠先是汀邵間有大帽山峒蠻最强屢征
不服益宗永寧王慈爰誘之出降以與 大兵戰屢
捷遂復撫州 大兵圍之鄭彩屯廣信府永寧王請
救其監軍給事中張家玉以三營往援圍暫解已而
復合彩軍潰撫州遂破永寧王歿之峒蠻亦散報至

舉朝震驚命削彩職戴罪圖功廷麟元吉退守贛州
大兵追攻之五月琉球國入貢廷試貢生取萬荆等
十二人命爲萃士照庶吉士例送翰林院教習擢湖
廣監軍道章曠爲右僉都御史巡撫湖北魯監國遣
都督陳謙入閩久駐衢州持兩端自云魯已爵爲侯
欲邀封召赴行在御史錢邦芭劾其外媾下獄將殺
之芝龍與謙有舊亟入朝請以官贖謙歿王故留芝
龍久語密促行刑芝龍出已歿矣因厚殮之由是益
懷異志加吏部尙書郭維經六省督師銜募兵援贛

時贛已被圍兩月巡撫劉廣胤戰敗受執援兵皆不
敢前六月開科取士命廣額七十名流寓者皆入試
以編修劉以脩閔肅爲主考舉葉瑣等一百七十五
名士子多以賄進乃命覆試落四名逮同考推官王
三俊下獄追賊一萬兩兵部侍郎前南贛巡撫李永
茂遣粵兵五千援贛與

大清兵戰於李家山圍暫解粵兵退守南康時贛城
堅守已久奉諭獎勞賜名忠誠府加楊文薦右都御
史偕郭維經出閩入援與楊廷麟萬元吉等爲協守

計浙東報至 大兵已渡江取紹興魯監國航海去
江上諸師盡潰鴻遠駐城外警報我兵至乃徒跣而
逃三日抵浦城事聞行在大震削其封爵秋七月元
子生大赦加恩從興諸臣悉進爵御史錢邦芭言浙
東新破唇亾齒寒舉朝正切同仇之日非蒙恩受賞
時也不報己巳王御門內侍捧小匣置御前詔諭羣
臣曰朕本無利天下心以勲輔擁戴不得已勉徇羣
策浣衣糲食有何人君之樂朝夕乾惕恐負重付豈
意諸臣已變初志昨巡聞之使得爾等出關迎降書

二百餘封今俱在此朕不欲知其姓名也今命錦衣
衛焚之午門前爾諸臣其有名者尙洗心滌慮否儻
能竭節奉公不渝終始是所望也王長身豐頤聲如
洪鍾聞者悚息時銳志出贛芝龍百計阻之欲留王
以自重既而陰通款於洪承疇托言海寇至馳還臨
安盡撤關隘水陸諸兵隨之去

大清兵既破浙東長驅而前仙霞嶺空無一卒遂如
入無人之境焉何騰蛟遣郝永忠以鐵騎五千迎駕
將至韶州 大兵已出衢州於八月乙未抵仙霞關

守浦城巡按御史鄭爲虹治餉兵科給事黃大鵬延平知府王士和歿之丁酉王自延平出奔宮眷皆騎猶載書十餘篋以從輔臣吾騶繼祚等隨行庚子入汀州城辛丑大兵奄至有十餘騎叩城稱扈蹕者開門納之則追騎也直入行宮從官迸散乃執王與曾妃去妃至九瀧潭投水歿王歿於福州其從難之臣有部郎賴垓給事中熊緯御營總兵胡上琛等或曰建寧代歿者爲唐王聿劍汀州代歿者爲張致遠王實未歿後鄭成功屯兵鼓浪嶼有遣使存問諸臣者云爲僧於五指山然亦莫必其真僞也是冬十月贛州聞王訃全城氣索會天霧雨雪城夜破督師大學士兵部尙書楊廷麟兵部侍郎左副都御史江廣總督萬元吉俱赴水歿吏部尙書郭維經御史姚竒亂入嵯峨寺自焚歿湖西兵備僉事太常卿彭期生自縊歿兵部職方主事周瑚被執不屈戮之右都御史楊文薦擒至南昌絕粒歿後以聞難繼歿者御史艾南英縊於汀州僧舍大學士蔣德璟於泉州不食而卒粵中承明王立遙上尊號曰思文皇帝丁酉春

復諡曰紹宗襄皇帝

勘本曰闖賊敗走九宮山爲村民鋤歿事在九月
原本載於楊廷麟萬元吉以義師守贛之下錯譌
甚矣其李錦高一功等乞降下至浙中諸將請如
衢州一節原闕又卷末是冬十月下贛州殉事諸
臣及後聞難繼歿者原本皆闕書今悉纂補

案唐王躬行節儉傷國家之多難至勅斷酒因其
初孤身南來鄭氏進美女十二人以充後宮王意
不忍拂姑留之然卒未嘗一御及也夫福京之亾

亾於芝龍之通款其釁則在王殺魯使臣陳謙而
起謙爲南直隸武進人先以乙酉之春賚福王詔
封芝龍南安伯比讀券誤書安南芝龍故南安人
心不懌謙曰南安一邑也安南則地兼兩廣當是
將軍福命所致爲佗日拓地開疆之兆又何不樂
爲請卽畱券易詔而更爵爲侯芝龍喜迺與之訂
交稱莫逆謙之行成於閩也先詣鄭言者謂芝龍
有異圖御史陳邦芭挾夙嫌遂譖謙於王所吾獨
恠以唐王之賢而肯信一陳邦芭且芝龍百計營

救甚至請以已官貸謙歾而王直以必殺謙爲快
究竟謙何辜哉歾辱此殘明氣數使然展轉致敗
爾聞中苟無此失則芝龍雖有貳心而未必愬然
投款掣兵以去芝龍存而福京或可旦夕延也芝
龍子森故爲王弄兒王爲之改成功名厥後背父
入海獨撐一面雖經屢抗

王師歾有餘辜而於魯監國則修頒詔之怨終其
身不肯奉徒以張司馬煌言以忠義相激勸僅爲
之施厲公禮至王雖殂而猶稱隆武號則其盡於
唐事也至矣

曾妃固通文義輔王管章奏凡外廷擬進批禽悉
由妃所決可否妃父文彥頗知大義絕不干與朝
政較監國之張國俊勝矣然王則內憚於妃亦多
所牽制及王將巡贛命妃先發甫出城而大兵
猝至妃亟投水歾

溫氏於宮壺俱闕書續當補纂后妃傳也今以
舟山安隆殉節諸妃嬪附摭遺紀諸

南疆繹史勘本卷三終

問答

天保三年

一

